



Sesida dals

Communitgà ils

Protocol nr.

15 da zercladur 2026

18 da zercladur 2026

434/2026

Incumbensa da la fracziun da la PPS

concernent il daner contant (emprim sutsegnader Sgier)

Resposta da la Regenza

Ils 8 da mars 2026 han las votantas ed ils votants svizzers refusà l'iniziativa dal pievel «Il daner contant è libertad» ed acceptà la cuntraproposta directa. En vista a quest fatg renconuscha la Regenza l'importanza dal daner contant. A medem temp stoi vegnir constatà, ch'il basegn da pagar cun daner contant sa diminuescha fermamain e ch'i vegnan duvradas en blers secturs praticamain mo metodos digitalas da pagar. La purschida dal chantun s'orientescha a la dumonda da la populaziun e resguarda la relaziun dals custs e dal niz sco er las pussaivladads dal chantun da prender influenza.

Tar il punct 1: En secturs, nua ch'i dat ina tscherta dumonda da pagar servetschs chantunals cun daner contant, è quai pussaivel e duai er restar pussaivel. Quai vala en spezial là, nua ch'i regna in viv traffic da glied e/u manaschi al spurtegl. Uschia pon ins per exempel pagar cun daner contant en butias da bains pursils dal chantun, tar museums chantunals, en la Biblioteca chantunala, tar l'Archiv dal stadi, en la Scola chantunala grischuna u tar purschidas gastronomicas e d'alimentaziun (p.ex. mensa, kiosk, restaurant). La dumonda da pagar cun daner contant sa reducescha però a favur da systems digitals e da process senza daner contant. Per exempel pajan anc 24 pertschient da las pestgadoras e dals pestgaders la patent en daner contant, però mo pli var 15 pertschient da las scholaras e dals scholars dal sector da furmaziun superiura lur custs d'alimentaziun. Fitg blers servetschs administrativs (p.ex. taglias, taxas, indemnizaziuns d'elavuraziun) vegnan liquidads oz praticamain mo sur assegni e cun meds da pajament digitals e senza daner contant – per exempel sur e-portals cun pajaments online directs (p.ex. carta da credit / da debit, Twint). Plinavant èsi uschia, ch'ins stuess manar – en lieus che han ina dumonda pitschna u temporara per pajaments en daner contant – ina infrastruttura da daner contant che chaschuna gronds custs (p.ex. sistem da cassa, tesor). Retrair, tegnair en salv e consegnar daner contant è collià cun ristgas pli grondas e cun pretensiuns da segirezza, che chaschunan dapli lavur e custs supplementars. Er la controlla e la cudeschaziun

correcta chaschunassan lavurs administrativas supplementaras. Per resumar: il daner contant vegn acceptà sco med da pajament orientà a la dumonda. In'obligaziun d'acceptar daner contant dapertut chaschunass dentant custs sproporziunads sin donn e cust dals pajataglias.

Tar il punct 2: I sto vegnir menziunà, ch'il chantun na po per regla betg decider sez davart la concepziun concreta da las pussaivladads da pajar en cas d'organisaziuns e da manaschis parastatals, als quals il chantun è participà u che adempleschan incumbensas publicas («interpresas parastatalas»), mabain ch'el ha en emprima lingia la rolla da l'empustader u da l'incumbensader. En il sector dal traffic public sa mussa quai exemplaricamain: Il chantun Grischun emposta e finanziescha la purschida ensemen cun la Confederaziun, entant che la concepziun concreta – inclusiv ils systems da distribuziun e las variantes da pajar – è chausa da las interpresas da transport. Tenor la risposta a la petiziun «AutoDaPosta senza daner contant NA!» è la vendita a daner contant vegnida abolida en il vehichel per motivs da manaschi, finanzials, sistemics e da la tecnica da segirezza. L'access al traffic public resta dentant garantì cumplainamain, perquai ch'i existan cartas da valor ch'ins po comprar cun daner contant («VendaPrepaid», Prepaid Card Alliance SwissPass) sco er alternativas sco posts da vendita, che permettian d'utilisar vinavant daner contant. Areguard las participaziuns chantunals, na po il chantun per il solit betg decider sez (participaziuns da minorità) ubain che in'obligaziun d'acceptar daner contant na fiss betg raschunaivla (p.ex. Associaziun grischuna per credits a l'agricultura). En vista a quests fatgs n'èsi betg inditgà d'obligar generalmain ils manaschis parastatals d'acceptar directamain daner contant e na fiss savens er gnanc realisabel. Decisiv èsi plitost, che l'access a prestaziuns restia garantì a tut las gruppas da la populaziun. Quai po er vegnir fatg tras alternativas equivalentas al pajament direct en daner contant, premiss ch'i saja garantì uschia in access senza discriminaziuns e pratitgabel.

Sa basond sin questas explicaziuns propona la Regenza al Cussegl grond da refusar questa incumbensa.



En num da la Regenza

Il president:

Martin Bühler

Il chancelier:

Daniel Spadin